

A firma e akte di Fundacion Museo Arubano

Un otro adelanto pa yega n'e meta di maneho

expansion y renobacion di diferente museo na Aruba

DEN cuadro di e maneho nobo pa loke ta museonan na Aruba, Minister Otmar Oduber tabata presente n'e firmamento di akte pa Directiva nobo diarazon merdia.

Despues cu Minister Oduber a papia cu e Directiva di Fundacion Museo cu ta maneha Fort Zoutman y a splica nan e vision p'e maneho nobo,

unda a dicidi di no bay inventa un wiel nobo y a escoge pa usa un instrumento cu tabata existi caba.

Tambe a combersa cu Archeologisch Museum, cu te n'e momentonan aki ta un Departamento di Gobierno, y a splica nan cu e intencion ta cu nan tambe mester bay drenta bou di e «overkoepelend orgaan» aki cu t'e 2 museonan existente y tin e 3 nobo nan na caminda cu ta Watertoren, Community Museum y muy pronto Carnaval Museum, e mandatario ta splica.

Ta hopi importante p'e museonan aki forma parti di dje y asina crea oportunidad nobo di entrada, no solamente pa Gobierno, pero p'e

diferente institutonan cu a compromete nan mes n'e maneho, expansion y renobacion di e diferente museonan.

Awe a haci esaki posibel den forma di un paso importante pa yega n'e plan. Dialuna lo haya e entrega oficial di e raport di AIB riba e proyecto di haci di San Nicolase di 2 capital turistico cu enfoke riba cultura, historia, monumento y museonan.

Pa Minister Otmar Oduber esaki ta un otro adelanto y e ta felicita tur e miembronan di e Fundacion Museo Arubano cu ta bay tin e encargo dentro di poco di 5 Museo y ta desea nan tur conocimiento y pasenshi posibel pa nan por haci un bon trabou mirando cu esaki ta bira un aspecto hopi importante pa nos turismo y nos hendenan local.

